

DOMENIE I DI CORESIME

Jutoris pe Liturgjie

Ai 10 di Març dal 2019

Ricevût il batisim e sintude la mistereose vôs dal cîl Tu tu sês il gno Fi plui cjâr, Jesù sburtât dal Spirtu Sant, al lè tal desert (Lc 3, 22; 4,1).

Par Jesù, pai profetis, pal piu israelit, il desert al è il lûc de precarietà, dal cidin, dai ripensaments, des grandis riflession, ricès di chei che a scjampin, moment unic par dâsi une drete tes sieltis di fonde de vite.

Ogni an la liturgjie midiant i corante dîs de Coresime nus invade ancje nô a fâ desert di cjacaris, di impegnis, di afârs e trainis, di chel cori di buride di buinore fin sere; par podê jentrâ, come che al à fat Jesù, tal santuari de nestre cussience e capî miôr li che si cjatìn e cualis che a son, tal judici dal Signôr, lis responsabilitâts reâls de nestre vite.

Te messe di vuê al ven proclamât il vanzeli des tentazions che a àn compagne la vite di Jesù e le àn segnade in ben, intant che forzit a segnin in mâl la nestre. Jesù cul so esempi nus palesarà cemût frontâlis e vincilis, e cheste e deventarà la nestre Pasche di liberazion di chel mâl che al comence dentri di nô; parcè che dal cûr dai oms a vegnin fûr i trisej pinsîrs... (cf. Mc 7, 21-23).

Antifone di jentrade

cf. Sal 90,15-16

Cuant che mi clamarà, i rispuindarai;
lu salvarai e i darai une grande innomine,
lu saciarai cuntune vite lungje.

No si dîs Glorie a Diu.

Colete

Diu onipotent, pal sacrament de Coresime ch'ò celebrin ogni an,
danus di rivâ a cognossi simpri plui a font il misteri di Crist
e di compagnâlu cuntune vite degne di lui.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Dt 26,4-10

Profession di fede dal popul elet.

Cheste leture nus presente il piu isrelit che al rive tal templi cul prin covon di vuardi di ufrî in ricognossince al Signôr. E insiemi il piu israelit al faseve la sô biele profession di fede.

Chel che o scoltin cumò, nol è un "credo" teologjic, teorico e dogmatic, come che nô o sin usâts; al è invece il ricognossi l'intervent di Diu te storie personâl e di un popul, un Diu che nol mole di restânus dongje par dânus une man e salvânus.

O podaressin provâ ancje nô a fâ de cronache de nestre vite un "credo" personâl di ricognossince al Signôr, començant: Gno pari al jere un...

Dal libri dal Deuteronomi

Mosè al fevelà al popul e al disè: «Il predi ti cjolarà di man il zeî e lu poiarà denant dal altâr dal Signôr to Diu. Denant dal Signôr to Diu tu disarâs chestis peraulis: Gno pari al jere un arameo

torseon; al lè jù in Egjit e a jerin in pôcs lajù prin ch'al diventàs un popul grant, fuart e numerôs. I egjizians nus faserin malegraciis, nus tibirin e nus meterin su pe schene une sclavitùt di no crodi. O vin ricorùt al Signôr, Diu dai nestris vons. Il Signôr al à scoltade la nestre vôs, al à viodude la nestre streme, la nestre passion e la nestre sclavitùt, e il Signôr nus à fats saltâ fûr dal Egjit cun man fuarte e cun braç tindût, cun grant terôr, cun spiêi e cun meracui. Nus à menâts culi e nus à dade cheste tiere, tiere ch'a scorin a rius lat e mîl. E jo cumò o puarti lis primiziis de tiere che tu mi âs dât, il Signôr. Tu lis metarâs denant dal Signôr to Diu e tu ti inzenoglarâs denant dal Signôr to Diu». Peraule di Diu.

SALM RESPONSORIÂL dal Salm 90

Salm plen di fiducie, familiâr ancje a Jesù; salm che al puarte pàs soledut tal moment de prove, de burascje, cuant che al samee che dut al larà in sfas.

Pal salmist Diu nol à bandonât e nol bandonarà; nus compagnarà simpri cui siei agnui, cu la sô presince forzit platade ma dal sigûr concrete.

Signôr compagninus ancje nô in chest cjaminâ viers laPasche di chest an.

R. Reste cun nô, Signôr, tal moment dal pericul

Se cjantât: Il cjant dai salms responsoriâi, p. 196

Chel ch'al sta sot la protezion dal Altissim
e a l'ombre dal Onipotent si pare,
che i disi al Signôr: «Gno ripâr e mê fuartece,
Diu gno, ch'o stoi fidât sun lui!». **R.**

No ti capitarà mâl di sorte
e disgracie no rivarà inte tô tende.
Parcè che ur darà ordin ai siei agnui
in ducj i tiei pas di tignîti vuardât. **R.**

Cu lis lôr mans a vignaran a cjapâti
par che il to pît tai claps no s'inçopedi.
Sui sarpints e su lis liparis tu cjaminarâs,
dragons e leonuts tu tibirarâs. **R.**

Za che mi vûl ben, jo lu salvarai;
parvie ch'al cognòs il gno non, lu quartarai.
Cuant che mi clamarà, i rispuindarai;
o sarai cun lui inte disgracie;
lu salvarai e i darai une grande innomine. **R.**

SECONDE LETURE

Rm 10,8-13

Profession di fede di cui ch'al crôt in Crist.

Cheste che S. Pauli nus trasmet, e jere la prime professon di fede des comunitâts cristianis e chest al è ce che noaltris o crodìn. O professìn di fat di sedi dissepui di Jesù muart e risussitât par nô e: chel ch'al crôt in lui nol restarà malapaiât.

Crodi in lui come cristians in chescj moments tant tenebrôs pe glesie, al significhe ancje fermâsi tal desert cun lui, dâi fiducie e lassâsi finalmentri istruî di lui.

De letare di san Pauli apuestul ai Romans

Fradis, ma ce disie la Scriture? “La perauale e je dongje di te, su la tô bocje e tal to cûr”. E cheste e je la perauale de fede che nô o proclamìn: se tu professis cu la tô bocje Gjesù come Signôr, e tu crodis intal to cûr che Diu lu à resussitât dai muarts, tu sarâs salvât. Di fat si crôt cul cûr par vê la

justificazion e cu la bocje si fâs profession par vê la salvece. Di fat e dîs la Scritture: “Chel ch’al crôt in lui nol restarà malapaiât”. Di fat no ’nd è plui difference tra gjudeos e grêcs: parcè che lui al è il Signôr di ducj, e al da fûr lis sôs ricjecis sun ducj chei che lu prein. Di fat “ducj chei ch’a prein il non dal Signôr a saran salvâts”.

Peraule di Diu.

CJANT AL VANZELI

cf. Mt 4,4

R. Laut a ti, o Crist, re di eterne glorie!

L’om nol vivarà dome di pan,
ma di ogni peraule ch’e ven fûr de bocje di Diu.

R. Laut a ti, o Crist, re di eterne glorie!

VANZELI

Lc 4,1-13

Gjesù, sburtât dal Spirtu Sant, al lè tal desert, tentât dal diaul.

Jesù tal desert e te sô vite al vinç lis trê tentazions:

tentazion di cirî dome il pan materiâl - l’om nol vîf dome di pan - smenteant o butant di bande la peraule di Diu;

tentazion de prepotence, dal domini sore chei altris, dal abûs di autoritât e di cussience bandonant la strade dal servî intant che Jesù al dîs Jo o soi tal mieç di vualtris come un che al servîs (Lc 22, 27);

tentazion di une religjon clericâl di miracui e di sucès smenteant il prossim che si intivà tai brigants che i puartarin vie dut lu pestarin e po s’in lerin lassantlu li plui di la che di ca (Lc 10, 30).

Peraule di Diu, sbassâsi a servî i piês, spirtualitât peade a la vite prime che al templi a son stâts il codiç e l’insegnament di Jesù: no nus reste che imparâ di lui e o vinçarìn ancje nô ogni sorte di tentazion.

Dal vanzeli seont Luche

In chê volte, Gjesù, incolm di Spirtu Sant, al lassà il Gjordan e, sburtât dal Spirtu Sant, al lè tal desert, là ch’al restà par corante dîs tentât dal diaul. Par ducj chei dîs nol mangjà nuie; tal ultin al sinti la fan. Alore il diaul i disè: «Se tu sês pardabon il fi di Diu, comandii a di chest clap di diventâ pan». Gjesù i rispuindè: «Al è scrit: “L’om nol vîf dome di pan”». Alore il diaul al menà Gjesù plui in alt e i mostrà tune batude di voli ducj i reams de tiere e i disè: «Ti darai dute cheste potence e lis ricjecis di chesj reams, parcè che mi son stâts dâts a mi e jo ur ai doi a di cui ch’o vuei jo. Se tu ti butarâs in zenoglon denant di me, al sarà dut to». Gjesù i rispuindè: «Al è scrit: “Tu ti butarâs in zenoglon dome denant dal Signôr, to Diu, e dome lui tu adorarâs”». Alore lu menà a Gjerusalem e lu poià su la part plui alte dal templi e i disè: «Se tu sês pardabon il fi di Diu, butiti jù di culi». Di fat al è scrit:

“Diu ur comandarà par te ai siei agnui,
par che ti tegnin vuardât”.

E ancjemò:

“Ti tignaran sù cu lis mans

par no che il to pît al sbati tor di un clap”».

Gjesù i rispuindè pe ultime volte: «Al è stât dit ancje: “No sta tentâ il Signôr to Diu”». Dopo di vê finide ogni sorte di tentazion, il diaul si slontanà di lui fin tal moment just.

Peraule dal Signôr.

Si dîs O crôt.

Su lis ufiertis

Danus la gracie, Signôr,
che la nestre vite e sedi ben intonade ai regâi che ti ufrin
tal celebrâ l’inizi di chest sacrament cussì venerabil.

Par Crist nestri Signôr.

Antifone a la comunion

Mt 4,4

L'om nol vivarà dome di pan,
ma di ogni peraule ch'e ven fûr de bocje di Diu.

Daspò de comunion

Daspò di vênus sostentâts cul pan dal cîl,
ch'al nudrîs la fede, al fâs cressi la sperance e al rinfuartîs la caritât,
insegninus, Signôr, a vê fan di chel ch'al è l'unic pan vîf e vêr
e a vivi di ogni peraule ch'e salte fûr de tô bocje.
Par Crist nestri Signôr.

Preiere sul popul

La tô benedizion ch'e dismonti bondante
sul to popul, Signôr,
par che inte tribulazion e cressi la sperance,
inte tentazion si rinfuarci la virtût,
e al puedi rivâ a la redenzion eterne.
Par Crist nestri Signôr.

* * *

Riflession di pre Antoni Beline: Il gjaul al torne

Te prime zornade di cuaresime, di chest timp che Diu nus da par disfâ i trucs dal vecjo sarpint e par imparâ a paronâ lis tristeriis dal pecjât e par preparâsi come cu va ai sflandôrs de Pasche, il vanzeli nus presente un dai moments plui grancj de vite di Crist. Che al à volût provâ midiant de tentazion cetant difcil che al è fâ il ben, cetant pôc che si sta a sbrissâ...

Vanseli par un popul, an B, p. 48.

* * *

Cjants dal timp di cuaresime

- Parce Domine, n. 125;
- Signore guardaci nel tuo amore, n. 126;
- O muse insanganade, n. 128;
- O capo insanguinato, n. 129;
- O Signôr a schene plete, n. 130;
- Viers la cjase amade, o Pari, n. 131;
- Crist, Fi di Diu, ve dûl di nô, n. 132;
- Gno Diu, mê ruvîs là che mi pari, n. 133;
- Se il timp che Diu ti preste, n. 134;
- Come a l'aghe de fontane, n. 135;
- Quanta sete nel mio cuore, n. 136;
- Alla tua mensa, amato Salvatore, n. 137.

Salm dal Miserere, n. 50.

- Misere mei Deus, n. 231;
- Ve dûl di me, n. 252; n. 253.

Strade de crôs, n. 138;

Via crucis, *p.* 285.

Tal libri Hosanna, si puedin cjatâ ancjemò altris cjants e salms adats al timp di cuaresime.

* * *

***Su cheste tiere al è pan in bondance par nudrî ogni persone,
ma al è masse pôc pan par saceâ l' aviditât dal om.***

Gandhi

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*
- * *Par domandâ chescj libris scrivêt a info@glesiefurlane.org*